

Wacana NC Bentang laporan Interim Pencapaian Universiti



Kuantan, 14 Ogos –Seluruh warga kerja Universiti Malaysia Pahang (UMP) berhimpun untuk mendengar Wacana Naib Canselor UMP bertajuk: Hari Ini dan Masa Hadapan yang disampaikan Profesor Dato' Dr. Daing Nasir Ibrahim.

Dalam ucapannya, beliau menyampaikan Laporan Interim Pencapaian Pelan Strategik UMP dan Pelan Strategik Pengajian Tinggi Negara (PSPTN) 2011-2015 sehingga 30 Jun ini bagi melihat sejauh mana pencapaian dan kejayaan universiti dalam memastikan ianya seiring dengan Pelan Pembangunan Pendidikan Malaysia 2015-2025 (Pendidikan Tinggi) [PPPMPT].

"Tahun 2015 yang berbaki empat bulan sahaja lagi menandakan penghujung fasa ketiga pertumbuhan UMP sebelum bermulanya fasa keempat bagi pelaksanaan Pelan Strategik UMP 2016-2020 ke arah menjana kecemerlangan universiti' katanya.

Dalam pada itu, Prof. Dato' Dr. Daing berbangga dengan pencapaian staf akademik dalam bidang penerbitan jurnal berimpak tinggi. Berdasarkan laporan MyRA (2012-2014) yang dibuat oleh Kementerian Pendidikan Tinggi, bagi 2014 bilangan penerbitan di dalam jurnal berindeks per staf akademik bagi UMP berada di kedudukan ketujuh (0.7) mata sitasi berbanding dengan 20 IPTA lain.



Namun demikian, berdasarkan laporan yang sama bagi tahun tersebut menunjukkan bilangan sitasi per staf akademik bagi UMP (2.4) berada pada kedudukan keenam iaitu di bawah lima universiti penyelidikan iaitu Universiti Malaya (9.8), Universiti Putra Malaysia (8.5), Universiti Sains Malaysia (8.3) dan Universiti Teknologi Malaysia (5.2) yang merupakan petanda besar bahawa UMP mampu bersaing dengan lain-lain universiti dengan sokongan warga penyelidiknya.

Beliau percaya pelan strategik ini akan mencapai objektif terutamanya dalam melahirkan graduan berketerampilan melalui penawaran program kejuruteraan dan teknologi yang kompetitif dan menjadi peneraju dalam menyediakan kepakaran serta perkhidmatan terhadap keperluan industri dan masyarakat.



Sementara itu, dalam masa yang sama UMP hari ini menganjurkan Majlis Sambutan Hari Raya Aidilfitri peringkat Universiti dalam suasana yang cukup meriah di hadapan Kompleks Sukan UMP di Gambang.

Katanya, majlis ini juga dapat mengeratkan hubungan antara warga universiti dengan kemeriahan sambutan Hari Raya Aidilfitri di samping terus berusaha memacu kecemerlangan universiti,"katanya.

Sebanyak 28 gerai disediakan mengikut jabatan yang menyediakan pelbagai juadah istimewa seperti menu Nasi Beriani Kambing disediakan oleh Fakulti Kejuruteraan Teknologi, sup dan roti disediakan oleh Jabatan Pembangunan & Pengurusan Harta, sebanyak 5000 sate disediakan Makmal Berpusat dan menu Mee Rebus disediakan oleh Pusat Bahasa Moden dan Sains Kemanusiaan (PBMSK). Lain-lain menu yang disediakan termasuklah nasi impit, lontong, laksa penang, cendol, Air Batu Campur serta beraneka air dan kuih muih.



Majlis ini turut diadakan pertandingan gerai tercantik dan paling kreatif bertemakan suasana hari raya. Pemenang dinilai berdasarkan kreativiti, kekemasan, kebersihan dan keceriaan dalam membuat reka bentuk gerai.

Juara gerai terbaik dimenangi Jabatan Hal Ehwal Pelajar & Alumni. Tempat kedua pula dimenangi Makmal Berpusat diikuti dengan Fakulti Teknologi Kejuruteraan di tempat ketiga. Manakala tempat keempat dan kelima pula dimenangi oleh Bahagian Keselamatan dan Pejabat Naib Naib Canselor.

Hadir sama Timbalan Naib Timbalan Naib Canselor (Akademik & Antarabangsa), Prof. Dato' Dr. Rosli Mohd Yunus, Timbalan Naib Canselor (Hal Ehwal Pelajar dan Alumni), Prof. Dato' Dr. Yuserrie Zainuddin dan Timbalan Naib (Penyelidikan & Inovasi), Prof. Dr Mashitah Mohd Yusoff serta Pemangku Pendaftar, Abd Rahman Safie.



Disediakan Unit Perhubungan Awam, Bahagian Komunikasi Korporat PNC

Posted By : SITI SARAH BINTI MOHAMAD RAJIMI Date Posted : 14-08-2015, 16:14:01